

Ministère de l'Agriculture, de l'Alimentation et de la Viticulture	8
Référence : 62/2025	
31 JAN. 2025	
A traiter par :	
Copie à :	

N°1866
Entrée le 30.01.2025
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 30.01.2025
Chambre des Députés



Här Claude WISELER
Chamberspräsident
LËTZEBUERG

Lëtzebuerg, den 30 Januar 2025

Här President,

Esou ewéi den Artikel 80 vum Chambersreglement et virgesäit, bieden ech lech, dës parlamentaresch Fro un d'Madamm Ministesch fir Konsumenteschutz an un d'Madamm Ministesch fir Gesondheet a Sozialversécherung weiderzeleeden:

„ Et ass rezent festgestallt ginn dat verschidde Produite vun der „The Coca Cola Company“ ze héisch Chlorat Wäerter opweisen. Dëst gouf bei enger Kontroll an enger Offëllanlag an der Belsch detektéiert. Deementspriedend gouf eng grouss Réckruffaktioun bei private Konsumenten a bei Händler déi dës Gedrénks verkafen, lancéiert. Vu dat Lëtzebuerg relativ vill Gedrénks aus der Belsch bezitt, sinn eis Betriber an eis Verbraucher och vun dëser Réckruffaktioun betraff.

An deem Kader wollt ech der Madamm Ministesch fir Konsumenteschutz an der Madamm Ministesch fir Gesondheet a Sozialversécherung follgend Froe stellen:

- Wei funktionéiert an dësem Kader d'Zesummenaarbecht mat de belschen Autoritéiten?
- Ginn hei zu Lëtzebuerg reegelméisseg Stéchprouwe vu Liewensmëttel a Gedrénks geholl?
- Wäerten an Zukunft méi Kontrolle vu Gedrénks a Liewensmëttel duerchgefouert gi fir esou eng Situatioun ze vermeiden?
- Fir Erwuessener géif laut der *Uni.lu* wéineg Risiko bestoen. Ginn et Bedenke bei der Consummatioun bei Kanner a Jugendlecher ? “

Mat déiwem Respekt,

Gusty GRAAS
Deputéierten



Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°1866 vum éierbaren Deputéierten Gusty Graas

1. Wei funktionéiert an dësem Kader d'Zesummenaarbecht mat de belschen Autoritéiten?

Den europäesche Schnellwarnsystem fir Liewens- a Fudderemittel, RASFF (Rapid Alert System for Food & Feed), gëtt vun der Europäescher Kommissioun geréiert an erméiglecht e séieren, effizienten an zentraliséierten Informatiouns Austausch tëscht de Memberstaaten an Drëttlänner, wann e Risiko fir d'Gesondheet am Zesammenhang mat der Liewensmittelkette festgestallt gëtt. D'legal Basis vum RASFF ass de Règlement (CE) 178/2002 an seng Gestoun gëtt duerch Règlement d'exécution (UE) 2019/1715 gereegelt.

Wann engem Memberstaat Informatiounen iwwer en direkten oder indirekte Gesondheitsrisiko, dee vu Liewens – oder Fudderemittel ausgeet, virleien an op d'mannst nach en anere Memberstaat oder en Drëttland iwwert d'Traçabilitéit betraff ass, muss dësen d'Informatiounen iwwer de RASFF un d'Kommissioun weiderginn. D'Kommissioun leed dës Informatioun dann un déi betraffe Memberen am RASFF per automatiséiert E-Mail weider. Zu Lëtzebuerg ginn dës Notifikatiounen vum Service systèmes d'alerte et de coopération an der ALVA geréiert.

D'Zesummenaarbecht mat de belschen Autoritéiten huet an dësem Kader iwwert de RASFF stattfonnt. Och wann de RASFF exklusiv fir d'Autoritéite vun de Memberstaaten, d'Europäesch Kommissioun an d'Europäesch Autoritéit fir Liewensmittelsécherheet (EFSA) zougänglech ass, gëtt et d'Datebank „RASFF Window“, iwwert déi d'Öffentlechkeet Accès op d'RASFF-Notifikatiounen huet. D'Notifikatioun wéinst ze héische Chlorat-Gehalt an de Produite vun „The Coca-Cola Europacific Partners“ am RASFF ënnert der Nummer 2025.0533 registréiert a kann iwwert de „RASFF Window“ iwwert follgende Link consultéiert ginn : <https://webgate.ec.europa.eu/rasff-window/screen/notification/739683>

2. Ginn hei zu Lëtzebuerg reegelméisseg Stéchprouwe vu Liewensmittel a Gedrénks geholl?

D'Lëtzebuerger Veterinär- a Liewensmittelverwaltung (ALVA) ass verantwortlech fir d'Kontroll vun der Liewensmittelkette, vum Produzent bis bei de Konsument. E järeliche Kontrollplang gëtt opgestallt fir d'Organisatioun vun de Stéchprouwe. Dëst geschitt op Basis vun enger Risikobewäertung, reglementareschen Obligatiounen an disponibele Ressourcen. Dëse Plang beschreift kloer d'Kontrollfrequenzen (Matrix/Analysen) a wéi eng Laboratoiren dës Analysen duerchféieren.

An dësem Kader ginn d'Echantillonen ouni Virwarnung, wéchentlech, um Niveau vun de verschiddene Etappe vun der Liewensmittelkette prelevéiert.

E Reseau vun offizielle Laboratoiren erméiglecht et, all néideg Kompetenzen ze decken, fir d'Kontroll vun de verschiddene Kontaminanten ze garantéieren, déi an der Ernährung fonnt kënnen ginn. Am Fall vum Opdauche vun engem neie Risiko, erméiglecht dëse Reseau u Laboratoiren der zoustänneger Autoritéit eng séier Kontroll, fir en héije Sécherheitsniveau fir de Konsument ze garantéieren.

Liewensmëttel a Gedrénks gi reegelméisseg am Kader vun den alljärelech geplangte Kontrolle gepréift. De Kontrollplang ass dynamesch a kann op Basis vun neie bedeitenden Informatiounen iwwert e Risiko fir d'Liewensmëttelsécherheet aktualiséiert ginn. Am Joer 2024 goufen 58 Jusen, jee no der Zort Jus, op Bakteriologie, Konservéierungsmëttel (zum Beispill Sulfiten) a Kontaminante (zum Beispill Pestiziden, Mykotoxine, Schwéiermetaller) getest. Des weidere goufen 2024 och 54 natierlech Mineral- a Quellewaasser ënner anerem op Bakteriologie, Pestiziden, physikalesch-chemesch Elementer an/oder PFAS analyséiert.

Partiell Joresrapporte kënnen iwwert folgende Link consultéiert ginn: <https://securite-alimentaire.public.lu/fr/organisme/pcnp/rpt.html>

3. Wäerten an Zukunft méi Kontrolle vu Gedrénks a Liewensmëttel duerchgefouert gi fir esou eng Situatioun ze vermeiden?

Dës Aart Tëscheffall ass am Planungsprozess, deen op Basis vun enger Risikobewäertung erstellt gëtt, abegraff. Ofhängeg vum Ursprung vum Problem an dem Niveau vum Risiko fir d'Liewensmëttelsécherheet kënnen zousätzlech Kontrollen ageplangt ginn. Donieft gi Produktionsvirfäll direkt vun de Betriber bewäert a geréiert, déi d'Verpflichtung hunn déi zoustänneg Autoritéiten z'informéiere wa Produkter, déi de Liewensmëttelsécherheetsufoerderungen net entsprechen, op de Marché bruecht gi sinn.

4. Fir Erwuessener géif laut der Uni.lu wéineg Risiko bestoen. Ginn et Bedenke bei der Consumatioun bei Kanner a Jugendlecher?

Op Basis vun eiser Risikobewäertung mat de nogewisene Chlorat-Quantitéite kënnen mir bestätegen, datt ee Gesondheitsrisiko bei klenger Kanner, fir déi op eisem Portail opgelëscht Produiten um Lëtzebuerger Marché, net ausgeschloss ka ginn. Vu datt ee Risiko fir Kanner bestoe kann, goufen déi betraffe Softdrinks vum Marché zeréckgezunn an d'Informatioun ass un de Konsument kommunizéiert ginn : <https://securite-alimentaire.public.lu/fr/actualites/alertes/2025/01/rappel-diverses-boissons-chlorate.html>

Eng akut Expositioun mat Chlorat kann d'Gesondheet schiedegen andeems d'Fäegkeet vum Blut, Sauerstoff ze absorbéieren, reduzéiert gëtt. Dëst kann zu Niereproblemer féieren. Bei chronischer Belaaschtung kann iwwerdeems d'Absorptioun vum Iod beanträchtegt ginn a soumat en Impakt op d'Funktions vum der Schilddrüs hunn.

Lëtzebuerg, den 3. Mäerz 2025

D'Ministesch fir Landwirtschaft, Ernährung a Wäibau

(s.) Martine HANSEN